

Tratiekèt, muotrėškās

Autoboselie muotrėškās
Apī gīvenēma rokoujas –
I ausi tīlē plauk kāp opē
Pasruoviou anū ruoda,
Vo kartās kāp so ratās
Trėnkdamā i kėita broki:
...Tas televizuorios sogedēs –
Vaizdelē skīpē, maišuos – nasoprasi,
Ē nauji pėrktē baimē – katēn maišē...
...Žēnā, ka Cicēns vara i keliuonē –
Kroizus naožtroks praplauktē,
So dainuoms, lėmozinās, šuokēs
Ē Lietovuo a basolauksem?..
...Tik nažiuopsuok, načiopėniekis –
Na liorbis kuoks lietovis –
I ožsėini ēšrūkēs, tik veiziek,
Ē draugou, jego kon, ēšplieš lėižovi...
...Politika, sakau, īr slīdi –
I Seima rinksem poiki vīra –
Valinski gal, vo gal Sabuoni –
Na tēp mizerējē bikuoki...
...Gerā žėnuok, gerā,
Ēš tuos puolitikas rėibos nabūsi –
Gal pėnsējē ē padėdies,
Bet muokestēs tėkrā ožplūsi...

Kāp blīnā kep, kāp pečios trašk,
Kalbelēs plauk ē plauk kāp opē:
...Puolitika, sakau, īr slīdi –
Kėšk karši parūkīta daktarou,
Teisiejou – līdi!..
...Geriau veizietē „Puona Bīna“,
Tik baisē maiša tuos reklamas!
Vierīk, navierīk, pagal anas
Kaimīnē perk jau ē pižama...
...Gerā, ka televizuorios sogedēs –
Vaizdelē skīpē, nieka nasoprasi...

Tratiekèt, muotrėškās, tratiekèt,
Ni jiestē narėk – doukėt pašnekietė!